

四庫全書

史部

欽定四庫全書

元經卷七

隋王通撰

唐薛收傳

宋阮逸注

經安帝隆安元年春正月即位加元服魏道武帝皇始
元年二月呂光將禿髮烏孤自稱大單于甲寅尊李氏
為皇太后戊午立王氏為皇后三月光將段業自稱涼
州牧夏四月王恭庾楷殺王國寶王緒秋八月慕容麟

殺慕容祥

無傳

冬十月

傳曰安帝諱德宗孝武長子也即位之歲當魏道武帝之皇始元年也然則一歲而書二帝何也文中子曰元經抗帝而尊中國其天命之所歸乎皇始之帝也徵天命以授魏也晉宋之主近於正體於是未忘中國

晉本中國之舊也未嘗有樹晉之功國中國之志

或問皇始授魏而帝

晉何也子曰主中國者將非中國也

假立以歲時不欲遽棄

齊

梁陳之君則斥之四夷以明中國有代矣

元經至魏大和乃尊

中國紀
年也

禿髮烏孤鮮卑人其先與後魏同出西晉時
樹機能侵有涼州之地武帝遣馬隆破之其後思復
韃受呂光假節河西都統烏孤嗣位至是稱大單于
西平王李太后諱陵容尊為崇訓太后王皇后諱神
愛父獻之母新安主太元二十一年納為太子妃至
是立為皇后禮也段業為建康太守有沮渠男成者
說業曰呂氏政衰權臣擅命府君以蓋世之才豈可
附垂亡之主男成今唱大義欲屈府君撫臨鄙州乃

推業為涼州牧甲戌王恭兖州刺史庾楷豫州刺史
共舉兵以討僕射王國寶王緒為名朝廷乃殺國寶
及緒以解兵書曰王恭庾楷殺王國寶王緒言政在
諸侯矣初國寶為會稽王道子妃由是與道子游處
又因尼妙音與太子母陳淑媛游帝悅其諂媚與從
弟王緒皆見知於道子倚以心腹為時所嫉俄掌朝
政於是王恭檄庾楷舉兵討之道子力不能拒諸侯
乃收國寶賜死并斬緒以謝恭楷政由諸侯而天子

弱矣且明道子執政之罪也

經隆安二年春帝正月三日龍舟灾夏五月蘭汗殺慕容寶秋七月慕容盛誅蘭汗王恭庾楷殷仲堪桓玄楊佺期舉兵反八月桓玄敗王師于白石九月詔會稽王道子率將軍謝琰王珣討桓玄冬十二月魏道武帝改元天興都平城襄陽流人叛牡炯反京口

傳曰龍舟災沴大也桓玄篡之象也天戒若曰王者流遷龍舟失水故災之耳慕容寶既敗於魏師南奔

蘭汗蘭汗者垂之舅盛之妻父也必謂無貳至龍城
為汗所殺慕容盛聞寶死即馳赴哀汗妻乙氏亦哀
盛遣其子蘭穆迎盛舍之親敬如舊盛夜因如廁袒
而踰垣入于東宮與舊昵人李旱等斬汗及其二子
王恭者蘊子也欲謀誅國寶與殷仲堪桓玄相結乃
抗表京師曰後將軍王國寶猥以姻戚驟登顯列先
帝登遐夜乃犯閤欲矯遺詔賴皇太后聰明逆謀不
果與其從弟緒同黨凶狡昔趙鞅興甲除君側之惡

臣雖駑劣敢忘斯義表至戒嚴道子割庾楷四郡隸江州楷怒使人謂恭曰貶削方鎮宜早圖之恭乃告殷仲堪桓玄衆推恭為盟主故書曰反以恭為首桓玄者溫孽子也聞王恭有憂國之言而桓玄潛意於功業乃說荊州刺史殷仲堪曰國寶并緒互相表裏若用殷覲為荊州則君何以處仲堪曰計將安出玄曰說王恭興晉陽之師我當率荆楚之衆此桓文之舉也俄移都督交廣玄不行乃與庾楷討江州刺史

王愉及譙王尚之兄弟率南蠻校尉楊佺期攻江州
王師擊之為玄所敗詔道子加黃鉞遣其子元顯等
討之玄等走潯陽魏道武帝改元天興者平慕容寶
始有燕趙之地於鄴置行臺建號為魏也古魏地也襄陽
流人常禮叛降姚興也杜炯新安太守反于京口詔
會稽王世子元顯討平之

經隆安三年春正月二月林邑陷日南九真遂寇交趾
交趾太守杜瑗討破之段業自稱涼王仇池公稱藩三

月尊陳夫人為皇后夏六月慕容德陷青州殺辟閭渾秋
八月禿髮烏孤死弟利鹿孤立冬十月秦姚興陷洛陽
十一月妖賊孫恩陷會稽十二月桓玄襲江陵殺殷仲
堪楊佺期梁呂纂殺呂紹自立

傳曰林邑國漢象林縣馬援鑄銅柱之地也其先范
逸奴文文攻大岐界小岐界式僕徐狼屈都乾魯扶
單等七國并有其衆四五萬人永和中文攻陷日南
害太守夏侯覽殺數千人餘奔九真以覽尸祭天鑊

平其城遣使告交州求日南之北橫山為界林邑少
田故貪日南之地四年文又襲九真害人十八九丈
死其子佛立寧康中佛常入貢至是復來寇日南九

真於是交州虛弱而林邑亦弊矣

按徽外諸國嘗以
寶物自海路入貢

以資貿易而交州刺史及日南太守
多貪利侵侮由是憤怒反為其攻破杜瑗討破之書

告功也段業前年自稱牧至是僭王仇池公稱藩以
言楊氏稟晉命也陳夫人諱歸女松滋潯陽人也初
入宮為淑媛生安恭二帝至是尊為皇太后禮也慕

容德稱南燕趨廣固寇青州殺我龍驤將軍辟閭渾

自此北鄙無主而人懷于魏矣

按慕容德先檄青州諸郡曰逆賊辟閭渾

父蔚昔同段龕阻亂淄川我太宰東征勦絕凶命渾於覆巢之下蒙全卵之施盜據東秦遣附吳越覆下

之雄岱北之士有新渾者實同佐命渾出奔追獲之斬於莒城禿髮烏孤將終謂羣

下曰方難未靜宜立長君故衆立其弟利鹿孤徙居

西平遣使梁明聘涼段業問曰有子何以不立明對

曰有子羌奴然先王所命也業曰昔成王幼周召作

宰漢昭八歲而金霍夾輔不亦可乎明曰宋宣能以

國讓春秋美之孫伯符委事仲謀終開有吳之業兄
終弟及殷湯之制也何必肩已為是紹兄為非業曰
美哉若使乎姚興攻洛陽執我太守辛恭靖自是二
京之舊皆陷後秦矣孫恩者孫秀之族子也父泰事
錢塘杜子恭學妖術誑百姓愚者敬之後有罪伏誅
恩逃于海聚黨百餘人因元顯暴政百姓騷動恩襲
會稽殺內史王凝之有衆數萬於是會稽吳郡吳興
義興臨海永嘉東陽新安凡八郡賊皆應恩起兵害

太守民死者十七八焉仲堪者驍騎殷師之子也能清言
善屬文與韓康伯齊名累遷至荆益都督隨桓玄所誘而反
聞恭楷已死乃奔還玄大失援以仲堪與楊佺期交質追至
江州及之其後仲堪佺期共擊玄為玄所敗佺期走襄陽仲
堪走鄴城皆為玄所殺書曰桓玄襲江陵言桓氏強非仲堪
能擊之也涼呂纂字永緒先符堅時入太學以此交結公侯
堅敗纂奔至姑臧及光死于紹秘不發喪纂入哭之甚哀紹
懼讓位於纂纂不許既而呂超言于紹宜早圖之紹不從曰

兄弟至親也豈有此乎每念袁尚兄弟未嘗痛心也臨機不斷大事去矣呂弘不樂紹立乃告纂廢昌邑之義請兄為中宗纂於是率壯士夜踰禁城守衛以劒斬纂中額壯士執守衛者纂曰勿殺義士也纂外結紹登閣自殺呂超出奔廣武纂僭即天王位謚紹為隱王書曰呂纂弑紹不言兄弟言兄不兄弟不弟故兩書若凡人相殺之文也

經隆安四年春帝正月二月星孛奎婁夏四月孫恩寇浹口五月東亭侯王琣卒己卯孫恩寇臨海謝琰自死六月庚辰司馬

劉裕討孫恩于南山秋七月太皇太后李氏崩無傳丁卯秦姚興
納乞伏乾歸降丁卯僕射王雅卒元顯殺車胤冬十一月元顯
封其子彥璋為東海王十二月河右李嵩稱涼公

傳曰己卯星孛于奎長三丈上至紫微入北斗奎至三台三
月遂經於太微帝坐端門占曰彗掃天子廷閣道易主象也
孫恩寇浹口據會稽自號經東將軍聞劉牢之來討曰我不
失作勾踐也王珣字元琳導孫也初為桓溫掾與謝玄齊名
溫稱珣曰謝掾四十必擁旄仗鉞王掾當作黑頭三公累遷

左僕射封東亭侯與殷仲堪徐邈王恭郗恢並以文辭見名於帝珣嘗夢人遺以大筆如椽俄而帝崩哀冊謚議皆珣草以疾解職歲餘卒書侯重王導世封也謝琰字瑗度安之子也破苻堅有功封望蔡公又平王恭遷衛將軍孫恩作亂詔琰與劉牢之俱進討既而不為武備恩自海島潛窺伺忽寇浹口入餘姚逼山陰琰遣參軍劉宣之拒恩咸以謂宜持重分兵設伏以待之琰不聽賊掩至塘路窄琰軍魚貫而進在艦中旁射之至千秋亭琰敗績為帳下都督張猛斫琰馬

墜地被害謚曰忠肅書曰自死讎不能兵又不恤其帳下宜
乎自敗死焉孫恩浮海向京口劉裕緣海拒之及戰大敗之
恩狼狽赴船走姚興患勃勃乾歸亂於西北偃檀蒙遜檀兵
河右咨謀將帥鎮撫二方於是乞伏乾歸先遣使送所掠守
宰謝罪請降許之復其子熾磐官爵經不書伐言興實患勃
勃而權納乾歸也元顯者會稽王道子子也驕侈聚斂專總
百揆故封其子彥璋為東海王書曰元顯封其子言政不由
帝也涼武昭王李嵩字玄盛初事段業業聽讒於索嗣而疑

焉於是晉昌太守唐瑤檄六郡推焉為涼公建年曰庚子屯
玉門陽關廣田積粟為東伐之資矣王雅字茂達魏衛將軍
肅之曾孫也性接下敬慎任過其才時人以佞幸目之道子
為太子太傅而雅為少傅時王珣有時望其男婚而賓客車
馬甚盛俄聞雅拜少傅輒迴詣雅雅應接傾心禮之孝武將
擢王恭殷仲堪等雅曰殷仲堪雖謹於細行幹略不長四海
無事必能守職若道不常隆必為亂階矣帝不聽有識稱其
知人末年慎默而已無復辯正遷僕射卒君子謂茂達潛知

季世非己能救故隱以保全詩曰既明且哲以保其身茂達之謂矣車胤字武子辟為桓溫從事與吳隱之齊名皆以寒素聞於世善於賞會當時皆云坐無車公不樂謝安遊集輒開筵待之孝武帝嘗講孝經陸納侍講卞耽謝石袁宏執經胤與王混摘句時論榮之太元中增置太學生胤領博士進爵臨湘侯以疾去職後為吳興太守不赴遷吏部尚書元顯有過胤密言於道子將奏之事泄元顯逼令自殺胤乃卒書曰元顯殺車胤譏無君也

經隆安五年正月二月呂超殺呂纂立其兄呂隆夏五月沮渠蒙遜殺段業六月孫恩至丹徒秋七月段興殺慕容盛九月呂隆降姚興

傳曰呂纂荒耽酒色又嘗責怒呂超超頓首稱不敢纂乃引起讌內殿呂隆屢勸纂酒昏醉超以劍刺纂洞胃斬纂首以徇曰纂殺害太子昵近小人番禾太守超以骨肉之親懼社稷顛隕今已除之矣乃立隆沮渠蒙遜臨松胡人也博涉書史頗曉天文滑稽善

權變呂光殺其二父蒙遜於是起兵據金山依段業
業封之為臨池侯蒙遜嘗謂兄男成曰業信讒變佞
無鑒斷之明今除業以奉公何如男成不許蒙遜告
男成叛業收男成殺之蒙遜泣告衆人曰男成忠於
段公枉見害諸君能為報仇乎衆皆泣從之羌胡起
兵響應遂殺業業京兆人儒素長者無權略故為姦
佞所誤而死孫恩至丹徒乙亥內外戒嚴命高素張
崇之守石頭劉襲柵斷淮口司馬恢之戍南岸桓謙

司馬允之毛邃備白石王嘏孔安國屯中堂譙王尚
之衛京城震恐設備也慕容盛寶之子也在位馭下
驕暴多所猜忌其臣段興因衆心搖動夜鼓譟大呼
盛聞變率左右出戰俄一賊從閤中擊傷盛召叔父
熙屬以後事而死熙立乃誅段璣等夷三族呂隆字
永基光弟寶之子也超既殺纂讓位於隆隆有難色
超曰今猶乘龍上天豈可中下隆在位多殺豪望以
立威名內外囂然魏安人焦朗者說姚碩德曰呂氏

因秦之亂制命此州諸子競尋干戈民死者大半明
公救生靈之沉溺布徽政於王門碩德從之率衆至
姑臧呂超出戰敗還超謂隆曰應龍以屈伸為靈大
人以知機為美天命去矣宗族可全隆乃降碩德碩
德表隆為涼州刺史

經元興元年春正月庚午大赦改元詔將軍元顯劉牢
之司馬尚之討桓玄三月劉牢之叛降桓玄辛未桓玄
敗王師于新亭殺元顯及其六子壬辰遷道子于安成

酖殺之南涼禿髮利鹿孤死弟傉檀嗣立孫恩死盧循為主秋七月乙亥奴殺新蔡王崇無傳冬十月冀州劉軌

叛歸慕容德

傳曰大赦改元政出元顯也道子為長夜之飲政無大小一委元顯故妄行政令赦出無名焉桓玄兵至京師匱乏惟給稗櫟而食劉牢之以元顯信任張法順故叛歸桓玄玄至新亭元顯棄船屯國子學堂列陣于宣陽門玄出大桁牢之率眾逐元顯執之送于

新亭縛於舫前而數之元顯答曰為張法順所誤遂
殺之玄奏道子酣縱不孝當棄市詔遷之於安成郡
尋亦鳩殺禿髮鹿孤死遺令以弟儁檀嗣儁檀少機
警鹿孤在位軍國事皆委儁檀及立自號涼王遷居
樂都歸款于姚興冀州慕容德舊牧之地也德既僭
號于滑臺而東接齊魯於是劉軌背晉歸德懼有辟
閭之誅也孫恩敗投水死妖黨猶曰為水仙衆推盧
循復為寇

經元興二年春二月劉裕破徐道覆于東陽夏四月癸巳朔日有蝕之秋八月桓玄自號相國楚王冬十一月壬午移太廟神主于琅邪十二月玄篡位帝蒙塵于潯陽

傳曰徐道覆者盧循黨也癸巳日蝕帝將蒙塵之兆也桓玄加九錫自稱楚王起荊州為國號也冬十一月壬午遷帝于永安宮癸未移晉神主于琅邪降諸侯舊封也桓玄於姑孰僭帝位大赦改元建始

興趙王倫

同又號永始執權年同其符僭逆如此於是劉裕等斬桓

脩於京口斬桓弘於廣陵立震駭出南門南奔逼乘
輿西上帝蒙塵于潯陽立所逼也

經元興三年春正月帝在潯陽三月庚申劉裕置留臺
具百官夏四月劉裕討桓立武陵王遵稱制攝萬幾五
月壬午督護馮遷斬桓立乘輿反正奉神主入太廟閏
月桓振陷江陵帝蒙塵于賊營六月毛璩討桓希斬之
秋七月戊申永安皇后何氏崩冬十月盧循寇廣州南

燕慕容德死兄子超立

傳曰帝在潯陽桓玄軍中也劉裕置行臺司徒王謐
推裕錄尚書事四月丙戌詔以幽逼於玄萬機虛曠
乃立武陵王遵遵元帝孫也字茂遠初封年十二受
拜流涕感動左右桓伊嘗詣遵遵曰吾門何為通桓
氏左右曰桓溫疎宗相見無嫌遵曰我聞人姓木邊
便欲殺之况諸桓乎由是以聰慧稱桓玄降遵為彭
澤侯遣之國行次石頭夜濤水入淮船破不得出會

義旗興復詔攝萬機內外敬之五月桓玄義軍戰于
崢嶸洲玄敗走將投梁州桓希彥州都督馮遷抽刀
而前玄曰何人敢殺天子遷曰殺天子之賊耳遂斬
玄首送京師梟于大桁乘輿反正復奉神主歸太廟
禮也桓振復據江陵以拒義師擁帝居賊營六月毛
璩自領梁州遣將攻漢中殺桓希彥桓氏始衰也皇后
何氏諱法倪父準后無子稱穆皇后居永安宮與安
帝蒙塵至巴陵劉裕奉后還都至是崩盧循譙曾孫

也娶孫恩妹恩亡衆推循為主泛海至番禺寇廣州
逐刺史吳隱之自攝州事遣使貢獻朝廷多虞權假
循廣州刺史慕容德迎其兄之子超于長安德夢其
父曰汝既無子何不立超寤而告其妻吾將死矣乃
下書以超為太子

經義熙元年春帝正月帝在江陵南陽守魯宗之破桓
謙桓振于柞溪劉道規擊桓謙走之乘輿反正戊戌詔
大赦改元二月譙縱殺刺史毛璩以蜀叛三月將軍劉

懷肅斬桓振帝至自江陵四月劉裕還京口秋八月冬十一月乞伏乾歸破仇池楊盛

傳曰魯宗之起義襲破襄陽進軍擊桓振與桓謙北走帝得反正乃改元義熙以義兵致重熙也譙縱巴西人也始為安西府叅軍蜀人愛之刺史遣縱東下縱有貳志因民不樂東行道次涪城毛璩聞之自涪城步還成都率兵討縱璩戰死焉劉懷肅自雲杜伐桓振廣武將軍唐興斬振奉帝至京師書曰至自江

陵告于廟也劉裕還京口言自還也非詔命能制矣
乙伏乾歸既附姚興姚興加乾歸為左賢王率眾攻
仇池楊盛于西陽堡大破之

經義熙二年春帝正月刺史司馬榮期擊譙子明于白
帝夏五月封法蓮為高陽王秋七月冬十月封劉裕豫
章公劉毅南平公何無忌安戎公

傳曰譙子明者譙縱將也司馬榮期為益州刺史擊
子明于白帝以破賊來告也南陽王法蓮高密王之

子也十月論匡復功劉裕為首劉毅何無忌次之其餘封賞有差不書略也

經義熙三年春正月二月車騎將軍劉裕來朝劉裕殺

殷仲文及其弟叔文道叔并駱球夏五月大水

無傳

六月

赫連勃勃僭位于朔方八月劉敬宣監征蜀冬十一月赫連勃勃敗禿髮傉檀慕容雲殺慕容熙自立

傳曰劉裕來朝者用劉穆之之謀自丹徒領揚州入輔政且疑殷仲文等異已也殷仲文雖娶桓玄妹而

素不交密作玄九錫辭納貨賄家累千金玄敗乞解
職待罪詔不許遷為東陽太守意不平劉毅深相禮
接之不過何無忌無忌疑其薄已中傷之言於劉裕

曰桓胤殷仲文腹心之疾

初赦文云除桓胤
外餘桓氏不赦

至是以

仲文與駱球謀反及其弟並誅之書裕殺者以其聽
何無忌中傷之也然仲文畜賄貪祿不為無過不稱
官者懲之也赫連勃勃字屈丐劉淵族也長八尺五
寸腰十圍美風儀性辯慧高平沒奕于以女妻之事

姚興使鎮朔方時有河西鮮卑獻馬八千與姚興勃
勃襲殺沒奕于并其衆僭稱天王國號夏以謂夏禹
苗裔也劉敬宣者牢之子也牢之平孫恩威名甚
振初與王恭同起兵背恭自降詔討桓玄輒降玄尋
又背玄歸晉有劉襲者謂牢之曰事不可者莫大於
反而將軍往年反王兖州也恭也近日反司馬郎君也安帝也
會復反桓公也玄也一人三反豈可得乎敬宣先還京口
失期不到牢之疑為劉襲所殺矣乃自縊俄敬宣至

與高雅之同奔慕容超玄敗復還京至是使平盧循
遷征虜將軍監征蜀勃勃偕號求婚于僞檀僞檀弗
許勃勃怒伐之殺萬餘人掠羊馬數十萬去僞檀追
之其將焦朗諫曰不如從溫園北渡趨萬斛堆阻水
結營制其咽喉百勝之術也其一將賀連曰彼牛羊
塞路財貨若山不能抗我宜在速追僞檀追之勃勃
聞而喜乃於陽武下峽鑿凌埋車以塞路逆擊大敗
僞檀慕容熙者垂少子也為妻苻后起承華殿土與

殺同儕典軍杜靜載棺上書諫熙怒斬之符后死熙如喪考妣使有司案檢臨哭者有淚以為忠孝無淚則罪之羣臣莫不含辛為淚將軍馮跋觀熙政暴虐推慕容雲為主發上方徙五千閉門拒熙熙葬符氏收髮貫甲身馳赴難攻北門不克走微服隱于林中索而殺之雲葬於符氏之墓國人皆笑之

傳夷禮所以言召禍也

經義熙四年春帝正月琅邪王德文領司徒劉裕錄尚

書事夏四月僕射孔安國卒秋七月冬十一月大風拔樹十二月陳留王曹靈誕薨

傳曰德文即恭帝也劉裕意先尊德文而後已圖進位也孔安國僕射愉之子也安國儒素清正嘗為東海王師詔曰卿導達津梁依仁游藝亦至左僕射卒大風拔木盧循兵至之兆也曹靈誕魏陳留王奐之後也書薨重國賓也

經義熙五年春帝正月二月慕容超寇宿豫執劉千載

趙元二太守而去三月將軍劉裕伐慕容超夏六月丙辰震于太廟秋七月九月盜殺高雲馮跋篡位冬十月魏紹殺其君道武帝

傳曰慕容超字祖明長八尺精彩秀發德甚愛之名之曰超立為太子及嗣位遣斛穀提公孫歸等率騎寇宿豫執南陽太守趙元陽平太守劉千載濟陰太守徐阮而去震于太廟者何春秋僖十五年震夷伯之廟罪人也於是展氏有隱慝焉今震太廟天戒若

曰廟社不靈人主昏弱權臣震蕩隱慝之咎發於此乎高雲即慕容雲也本姓高氏自以謂無功德而豪傑所推常畏懼畜養壯士以為腹心有離班桃仁者專典禁衛賞賜月至數千不測殺雲而衆推馮跋為主跋字文起信都人也慕容寶召署為將軍至是僭稱天王魏道武帝拓跋珪獻明皇帝之子也其子清河王紹作亂弑崩長子嗣誅元凶紹而立稱明元皇帝

經義熙六年春帝正月三月將軍劉裕克慕容超齊地
悉平賊循來寇將軍何無忌拒循於豫章死之夏五月
戊子將軍劉毅及循戰于桑洛洲王師敗績僕射孟昶
自殺秋七月盧循去寇荊州復走潯陽八月秦將桓謙
寇江陵冬十一月蜀將譙縱陷巴東

傳曰慕容超任公孫五樓故人為之語曰欲得侯事
五樓至是劉裕伐超慕容鎮言曰昔成安君不守井
陘之關終屈於韓信諸葛瞻不據東馬之險卒擒於

鄧艾臣謂阻守大峴上策也超不從俄而公孫五樓
段暉皆敗而超守廣固乞救于秦會秦為赫連所破
救兵不至超歎曰吾寧奮劍決死不能銜璧求生裕
用降人張綱以衝車版屋及飛樓懸梯臨其城超支
解綱毋城破執超神色自若一無所語送建康市斬
之何無忌東海剡人其舅劉牢之無忌始事東海王
彥璋密與劉裕圖桓玄玄甚懼言曰劉裕勇冠三軍
當今無敵劉毅家無擔石之儲擣搗一擲百萬何無

忌酷似其舅舉大事何慮不成及破桓玄遷都督八
郡事盧循別帥徐道覆順流大艦重樓無忌率衆拒
之長史鄧潛之諫曰舟艦居上流蜂蠆有毒宜決南
塘守二城以待之賊必不敢捨我遠下俟其疲老擊
之無忌不從戰敗無忌厲聲曰取我蘇武節來躬親
督戰握節死之劉毅為衛將軍朝廷以盧循自江陵
與徐道覆合勢來寇江寧詔毅拒戰于桑落洲為循
所敗孟昶聞賊至京師大懼乃自殺循攻石頭柵不

利船艦為暴風所傾乃進攻京口掠無所得迴據潯陽將取荊州劉裕統大衆繼進戰大敗之循單舸收散卒走桓謙以玄既亡乃奔蜀進謙署為荊州刺史率衆而下至枝江刺史劉道規擊而斬之譙縱遣其弟子明為鎮東將軍攻巴州尅之遂屯于白帝自稱成都王

經義熙七年春帝正月二月將軍劉藩斬徐道覆于始興夏四月交州刺史杜慧度斬盧循於水中秋七月冬

十月涼李嵩敗沮渠蒙遜

傳曰劉裕先遣孫處從海道據番禺盧循歸不能入
徐道覆保始興至是皆為刺史所斬傳首京師賊悉
平也涼李嵩初西時留女名敬愛養於外祖尹文文
既東遷從姑梁褒母養之其後禿髮傉檀假道北山
遣褒送敬愛于酒泉與嵩通好嵩率騎二萬畧地至
建東沮渠蒙遜聞之來侵建康嵩大怒率兵追及戰
于彌安大敗之

經義熙八年春帝正月二月甲寅山陰地陷夏五月乞
伏公府殺乞伏乾歸秋八月皇后王氏崩庚辰劉裕矯
詔殺劉毅及劉藩謝混大赦天下冬十二月將軍朱齡
石伐蜀

傳曰山陰地陷方四丈有聲如雷占曰地陷裂者臣
下分離坤道喪也乞伏乾歸於義熙三年僭稱秦王
至是略于五谿有梟集其手乾歸惡之俄為兄子公
府所殺及其諸子十餘人公府奔大夏乾歸長子熾

磐舉兵討之公府走智遠等追擒于嶮嶺山并其四子輟之熾磐自立王皇后諱神愛獻之女也無子崩年二十九葬休平陵號安僖皇后劉毅字希樂沛人也討桓玄功最多嘗與何無忌不平毅能引咎不校時論韙之又討盧循有功累加都督荆揚交廣請劉藩為副劉裕覺其貳於已乃奏帝曰劉毅傲狠凶戾履霜日久長惡不悛志在姦妄從弟藩遠相影響招聚剽掠左僕射謝混憑藉世資輕佻躁脫扇動內外

連謀百里是而可忍孰不可懷乃收劉藩謝混誅之
裕自率衆討毅命王鎮惡等至豫章燔舟而進攻陷
外城毅與戰至日暮焚諸門力攻之毅自北門單騎
走去江陵而縊先書殺毅者言劉裕志在除毅而逮
及藩混也且貶裕專殺故不書官朱齡石伐蜀縱出
奔尚書令馬耽者封府庫以待王師縱自縊而死
經義熙九年春帝正月三月劉裕殺諸葛長民夏四月
弛湖池之禁秋九月封劉義真桂陽公冬十二月高句

麗倭國來貢

傳曰諸葛長民琅邪人有文武幹才不持行檢始為
桓玄叅軍有罪免及劉裕建義長民預謀以討玄功
拜輔國將軍又平盧循都督六郡監太尉留府事貪
侈殘虐百姓苦之劉毅誅死且曰昔年醢彭越前年
殺韓信禍其至于貧賤常思富貴富貴必履危機今
欲為丹徒布衣豈可得也裕聞而疑之伏壯士幘中
引長民與語壯士自後拉而殺之收其弟黎民黎民

驍勇與捕者苦戰而死小弟幼民逃于山中進擒戮

之

傳曰裕酷及其弟也

四月罷臨沂湖熟皇后脂澤田詔賜貧

民因而弛湖池之禁古之道也昔文王靈臺靈沼與民共之漢詔以苑囿給賜貧民晉祚下衰劉裕擅此所以取民心也雖然但能法古利民之主也劉義真者何裕次子也無功而封公將自愛其家也高麗扶餘種也倭國大海山島百餘小國相接魏時有三十國戶十萬黠面文身自言太伯之後其道當會稽

東重譯入貢

經義熙十年春帝正月三月戊寅地震夏六月乞伏熾
磐滅禿髮儁檀秋九月丁巳朔日有蝕之冬十月城東
府

傳曰戊寅地震劉裕之權威矣乞伏熾磐與沮渠蒙
遜合勢攻儁檀儁檀敗而歎曰蒙遜熾磐委質於吾
而我歸之不亦痛哉四海之廣匹夫無所容身與其
聚而同斃不若分而獲全以兄之子樊尼使之西遂

降熾磐熾磐遣使郊迎諸城從而皆下惟浩豐尉賢政不下熾磐呼之曰樂都已潰卿獨守何為賢政對曰受涼王恩厚為國藩屏雖知樂都已潰妻子被擒然不知主上存亡未敢歸命昔羅憲待命晉文亮之文聘後來魏武不責委付之重竊用耻焉大王將安用哉熾磐遣傳檀子手書諭之賢政諭武臺曰汝為國儲不能盡節棄父背君虧萬世之業我義士也豈若汝乎既而傳檀至乃降書滅者傷滅其國也丁巳

日蝕革命之徵也城東府者何尚書府也自道子元

顯分東府西府掌其事至劉裕因之居東府今城之

防不虞也

傳言裕錄尚書事而城其府以防他變也

經義熙十一年春帝正月荊州司馬休之雍州魯宗之

舉兵討劉裕二月秦姚興死子泓立三月辛巳劉裕及

司馬休之戰于江津王師敗績

休之義兵故書王師

夏五月司馬

休之魯宗之出奔姚泓劉義真封彭城公朱齡石豐城

公巳酉霍山崩秋八月丁未僕射謝裕卒

無傳冬十月

傳曰司馬休之字季預譙敬王恬第三子也討王恭
庾楷有功後為桓玄所敗奔慕容超及玄敗復歸京
師遷平西將軍都督荆雍六州子文思作亂休之上
疏請解荊州歸罪闕庭不許遂與魯宗之共誅執政
者時休之次子文寶兄子文祖在都下皆為裕先賜
死自率兵征之遺休之治中韓延之書曰文思事遠
近所知送與司馬君使自訓厲至公之極也而了無
愧心久絕表疏天地所不容吾受命西征止其父子

而已彼土僞舊一無所問吾虛懷期物自有由來韓
延之報曰聞親率戎馬遠履西畿士庶惶駭莫知師
出之名也辱疏始知譙王前事良增歎息平西廼體
國忠貞款懷待物以公有匡復之功家國蒙賴譙王
往以微事見劾猶自表遜位況以大過當默然便及
于戎自義旗以來方伯誰不先咨疇而徑表天子可
謂欲加之罪其無辭乎劉裕欲誑國士天地不容在
彼不在此矣劉藩死於閭闔之門諸葛斃於左右之

手甘言詭語方伯襲之以輕兵遂使席上靡歎懷之
士聞外無自信諸侯良可恥也吾以平西之至德寧
可無授命之臣乎當與臧洪遊於地下耳裕得書而
歎曰事人當如此魯宗之自襄陽會休之共屯江陵
拒裕戰于江津大敗俱奔姚興興死裕平姚泓又奔
魏義隆裕之子與朱齡石論平蜀之功故皆封公已
酉霍山崩出銅鐘六枚記異也

古祠神名山多以鐘磬藏其地故陵遷而

出

經義熙十二年春帝正月姚泓遣魯軌寇襄陽夏赫連
勃勃取秦州秋八月琅邪王德文伐秦姚泓冬十月秦
將姚洸以洛陽降己丑高密王恢之修五陵

傳曰魯軌者宗之子也宗之既奔秦遣其子軌欲取
襄陽為晉將趙倫所擊敗走夏赫連勃勃攻秦上邽

克之殺秦州刺史姚平又攻陰密姚恢棄安定奔長

安書曰取秦州言易也

經書取秦州傳言克上邽按地理志秦武公伐邽戎有上

邽有下邽上邽隸秦州下邽隸臨晉至勃勃秦州刺史鎮上邽城

八月劉裕同琅邪

王德文伐姚泓經書德文不稱裕者先宗王而抑權臣也裕心欲挾帝弟之勢遠伐中原本防他變爾經特不書裕嫌征伐自諸侯出抑其太盛也十月裕將檀道濟至洛陽姚洸懼出降高寔王恢之敬王恬之子也姚洸既以洛陽降詔恢之修宣景文武惠帝陵禮也

經義熙十三年春帝正月甲戌日有蝕之

無傳

二月涼李

嵩死子歆立三月將軍王鎮惡破姚紹于潼關夏四月

劉裕敗魏師于河曲秋七月劉裕克長安滅姚泓冬十二月僕射劉穆之卒

傳曰李嵩寢疾顧命宋繇曰吾喪亂之際遂為此方所推不能一同河右今氣力憊然不復起矣死者人理吾不悲之所恨志不申耳吾終之後世子歆猶卿子也無使專驕自任薨年六十七謚曰武昭王歆字士業府寮奉為涼公姚泓遣胡翼度據潼關遣姚鸞步騎五萬拒晉師於潼關裕使王鎮惡自秋社西渡

渭逼姚難引師而西是時大霖雨渭水漲不得北渡
鎮惡水陸俱進追及姚難姚難陣涇上拒鎮惡鎮惡
敗之遁還長安姚紹總其事聞晉師過關嘔血而死
書曰破姚紹紹總師也魏遣將娥青救姚泓至河曲
為劉裕所敗斬其裨將阿薄子七月劉裕進攻長安
泓將妻子詣壘門而降宗室百餘人亦降裕盡殺之
送泓建康市斬之

姚萇以孝武太元九年立至
泓三世而滅共三十二年

經義熙十四年春正月辛巳大赦沈田子殺王鎮惡于

長安劉裕封宋公秋七月冬十一月赫連勃勃敗王師于青泥復陷長安十二月戊寅劉裕弑帝崩

傳曰夏赫連勃勃聞劉裕破姚泓謂羣臣曰裕克長安利在速返必留子弟守關中待裕發軔吾取之易於拾芥耳於是據安定盡有嶺北之地裕遺勃勃書請連和勃勃命皇甫徽為文陰誦之乃召裕使口授令人為書答裕裕覽文奇之既而留子義真守長安而還勃勃之臣王買德進計曰劉裕以亂攻亂未有

德政濟蒼生使弱才小兒守之非經遠之計也狼狽而返者欲速成篡耳無暇有意於中原陛下以順伐逆義貫幽冥青泥上洛南師之衝要宜斷其去來之路然後杜潼關塞峭險絕水陸之道義真獨坐空城逃竄無所可謂兵不血刃而自定矣勃勃從之使買德南斷青泥勃勃率大軍繼至義真使沈田子逆戰不利田子與王鎮惡出城遂殺之義真又討沈田子於是閉門自守赫連夜襲長安裕聞之大懼召義真

鎮洛陽使朱齡石守長安義真東歸百姓逐齡石而迎勃勃入長安勃勃謂王買德曰卿往日之言可謂筭無遺策也復陷長安貶裕之罪也言速篡位無意於中原也戊寅帝崩于東堂年三十七帝不慧自少及長口不能言雖寒暑無所辨凡動作皆非已出故桓玄之篡因此獲全初有讖云昌明之後有二帝故裕密使王韶之縊帝而立恭帝以應二帝然後禪代也故經書劉裕弑帝崩春秋之制凡弑君稱君君無道

也稱臣臣之罪也又例曰凡自虐其君曰弑也君子
謂劉裕殺姚泓之已降及宗室從而遇害其後蕭齊
篡宋汝陰見殺劉無少長盡幽死易所謂積不善有
餘殃其劉裕之謂乎

經晉恭帝元熙元年春正月帝即位立皇后褚氏甲午
劉裕還朝夏四月秋七月劉裕移鎮壽陽冬十月乙酉
劉裕以義真鎮揚州十一月丁亥朔日有蝕之十二月
黑龍四見東方

傳曰恭帝諱德文安帝母弟也初封琅邪王義熙十
四年十二月劉裕矯安帝遺詔曰大司馬琅邪王體
自先皇明德光懋屬推儲貳衆望攸集其君臨晉邦
奉系宗祀允執厥中燮和天下闡揚來誥無廢我高
祖之景命遂即位劉裕自伐秦回是月始朝焉移鎮
壽陽以其子義真鎮揚州據外勢以窺內也丁巳日
蝕晉祚盡此焉黑龍四見者何傳曰皇之不極是謂
不建厥咎眚厥罰常陰厥咎弱時則有龍蛇之孽有


下人伐上黑陰色也見東方劉氏出東海之應也

經元熙二年春正月夏六月劉裕至京師諷帝禪位于

宋

傳曰六月劉裕至京師傅亮承裕旨諷帝禪位草詔而請帝書之帝謂左右曰晉氏久失之矣今復何恨乃書赤紙為詔甲子帝遜于琅邪舊第裕以帝為零陵王居秣陵行晉正朔車旗服色一如舊法然有其文而不備其禮焉明年裕使兵人踰垣弑帝于內房

謚曰恭帝年三十六經不書弑謂前年已弑安帝今
通以禪則弑之義欲蓋而彰焉



元經卷七

欽定四庫全書

史部

元經卷八至十

詳校官編修臣范來宗

洗馬臣王坦修覆勘

總校官庶吉士臣朱 鈐

校對官侍讀臣王家賓

謄錄監生臣朱連傑

欽定四庫全書

元經卷八

隋王通撰

唐薛收傳

宋阮逸注

經宋高祖武帝永初元年後魏明元帝五年夏六月宋
受晉禪秋七月陳留王曹虔嗣薨八月癸酉立義符為
皇太子九月北涼滅西涼

傳曰不書正月二月系晉朔也不言即位晉元熙二

年夏已書晉禪于宋也曷謂今六月復書宋受晉禪
曰晉史異辭宋史異辭元經包晉宋之史異辭其事
則一也事一辭異猶春秋之法也陳留王曹虔嗣魏
後也書姓以別非宗室王也義符長子也立為皇太
子正也北涼沮渠蒙遜玄始九年伐西涼李士業滅
之不書名氏志其地以告也曷謂舉地以告曰東晉
涼州牧自張軌世稟晉命至是李暉據燉煌州沮渠
蒙遜據張掖州各僭號建元其實晉一牧而已故舉

涼地相減為文不書姓氏如春秋赤狄白狄之類皆狄而已無所裨也

經永初二年春帝正月辛酉祀南郊大赦二月己丑策舉秀才孝廉夏四月禁淫祀房廟秋九月晉恭帝為宋

所滅

書減司馬氏

冬十一月葬晉恭帝

傳曰郊祀就南本陽位也郊周祭天名也祀天以遠祖配自三代以來尊此禮惟周公因攝政率天下諸侯朝于明堂由是尊文王祭於明堂以配上帝魯用

天子禮樂因周公以尊祖也故魯之郊卜郊卜牲過則書以示訓也今宋之革晉相公漢魏舊典凡郊祀告天肆赦所以易民耳目爾其於尊祖因心則與古制異焉策試州郡所舉秀才孝廉於延賢堂行漢故事也禁淫祀房廟者何自秦漢而下方士妖術非鬼而祭妄求私福謂之淫祀正寢之旁設以房室無稽而祭謂之房廟宋初知其弊故詔禁止之禮也晉恭帝既禪位封零陵王宋使兵人殺之書為宋所害此

宋史與晉史異辭也

晉史曰劉裕弒帝崩宋史曰晉帝為宋所害

元經因

晉宋二史成文在晉安帝時劉裕人臣也故書弒所以貶亂臣之逆也在宋祖之世晉恭降為王宋為君主故書為宋所害以哀前代非義而死元經實傷之耳雖傷之亦必變文所以明宋為君主猶害人臣也

案本史曰零陵王殂宋志也言宋志在於殺者若春秋鄭伯克段傳云是謂鄭志也盡滅司馬

氏之族不書于經何也曰義熙十四年貶裕弒君已重故其滅尤酷之也葬晉恭帝如魏明帝葬漢山陽

公故事權也

經永初三年春帝正月詔刑無輕重悉原之徐羨之錄
尚書事二月星孛虛危夏四月封楊盛為武都郡王癸
亥帝崩于西殿秋七月冬十一月魏師克滑臺

傳曰正月甲辰詔刑罪無輕重皆原之非禮也曷謂
非禮夫國之刑制原情輕重故虞書青災肆赦怙終
賊刑堯舜之為也周禮刑平國用中典刑新國用輕
典刑亂國用重典蓋輕重中典臨事適宜無幸免無

濫入民是以信不犯有司古之道也今刑無輕重悉
原之出於一人之私妄求於一人之福天安信祐哉
傳言五月帝果崩
赦罪無足驗也徐美之錄尚書事帝顧託也帝疾

甚召太子戒之曰檀道濟雖有幹畧而無遠志非如
兄韶徐美之傳亮當無異圖故書徐美之舉顧託之
首也星孛虛危占曰虛二星主死喪哭泣危三星主
墳墓有孛焉此帝將崩之兆也楊盛仇池公楊世之
後也世長子纂居仇池其弟統起兵武都與纂為符

秦所滅而統獨存至是宋初有天下務懷遠方故封其子孫以盛為王宋權也癸亥帝崩于西殿帝漢楚元王之後諱裕字德輿小字寄奴世居丹徒京口以平孫恩桓玄有大功累遷至錄尚書事討慕容超以車四千兩為二翼方軌徐行政滅之廻討盧循以萬鈞神弩摧陷之又北伐加位相國策封宋公討姚泓平長安進爵宋王晉恭帝元熙二年禪位于宋帝不許太史令駱達奏天文符應案晉義熙之元年太白

書經天凡七占曰人更主異姓興又五虹見鎮歲太白熒惑聚東井八太微黑龍四登天漢世建武至建安一百六十六年而禪魏魏自黃初至咸熙四十六年而禪晉晉自太始至今一百五十六年揖讓咸躬於六廢帝即天子位在位三年崩年六十七魏明元帝遣將攻滑臺克之書曰滑臺不守也

經少帝景平元年春帝正月帝即位夏四月魏師陷虎牢執毛德祖太皇太后崩秋七月立張夫人為皇太后

冬十月星孛于氐魏明元皇帝崩

傳曰少帝諱義符高祖長子也魏師既克滑臺乘勝
攻虎牢陷之執宋刺史毛德祖德祖毛寶宗子也執
而不殺言魏強也知為力屈非降故不書降太皇太
后蕭氏崩高祖初為宋公宋王加太妃太后之號武
帝踐阼尊之曰太皇太后至是崩于顯陽殿年八十
一張夫人生少帝有司上尊號為皇太后春秋之義
母以子貴也星孛于氐者占云氐四星上者宿宮后

妃之府有星孛焉宮闈有變之兆也魏明元皇帝拓跋珽諱嗣道武帝長子也崩時年二十二謚曰明元書崩抗帝以尊中國也

經景平二年春帝正月己卯朔日有蝕之二月徐羨之殺廬陵王夏五月衆廢帝為榮陽王六月癸丑徐羨之弑榮陽王崩

傳曰己卯日蝕帝將廢之應也徐羨之殺廬陵王義真義真武帝第二子也昔從帝收中原留義真鎮長

安為赫連勃勃所逐武帝崩徐羨之等因義真與少
帝不協遂廢為庶人遣吏殺於徙所書羨之殺者貶
其專殺也衆廢帝者何徐羨之傅亮王弘檀道濟謝
晦中外衆臣共議帝過惡乖失羨之使舍人邢安泰
弑帝於金昌亭然則廢帝稱衆者天下之公也弑帝
書羨之者亂臣之首也曷謂天下之公曰天之生民
樹之以君言衆樹之也失道則為獨夫故廢昏舉明
以安天下此所謂公也既廢矣又從而殺之此亂臣

之惡羨之為首乎故特書徐羨之弑帝別未立君亟行弑逆以明一日不可以無君也

經文帝元嘉元年魏大武皇帝始光元年春正月帝即位夏四月秋八月大赦改元九月丙子立皇后袁氏

傳曰文帝諱義隆武帝第三子也少帝既廢百官迎

帝立之八月丁酉即位于中堂書正月即位者正五

始也大赦改元以元嘉為首也魏大武諱燾明元長

子即位之歲改元始光適與元嘉並

並謂相也

皇后袁氏

名齊嬀父湛左光祿大夫后初遣帝為王妃至是立為皇后正也

經元嘉二年春帝正月辛未祀南郊夏四月秋八月乙酉彭城王義康為司空冬十一月楊玄為武都王

傳曰秦漢而下郊祀志記有甘泉后土五峙神祇事多不經魏晉之君親祀郊祭以祖配天損益不定元帝過江立郊祀儀依漢獻帝都許故事乃設南郊於已地依漢光武故事正月建郊之禮按周禮云三王

之郊一用夏正故宋禮亦沿晉制而日惟用辛從古
禮也彭城王義康者武帝第四子也少聰察司徒王
弘表王宜入輔政乃拜司空稱也楊玄者仇池公楊
盛之子封爵也襲也

經元嘉三年春帝正月丙寅誅徐羨之傅亮詔將軍到
彥之執謝晦

不言誅

二月己卯謝晦伏誅夏五月乙巳涼

州牧沮渠蒙遜改大將軍冬十二月吳郡徐佩之反

傳曰徐羨之字宗文初為叅軍與武帝同府深相親

結以佐命功進錄尚書事無學術而局度詳整傳亮
字季友咸立孫也博涉經史至中書令有佐命功與
徐羨之同受顧命及少帝廢義真死迎立文帝密有
誅羨之亮意羨之走出自縊載尸付廷尉亮亦奔追
收之臨刑曰亮受先帝遺命黜昏立明社稷之計欲
加之罪其無詞乎遂伏誅謝晦字宣明晉太常哀之
立孫也美風儀時人方之楊德祖從武帝征關洛內
外要任悉委晦及聞咸陽淪沒武帝欲北伐晦以王

粲詩諫曰南登霸陵岸回首望長安悟彼下泉人喟然傷心肝武帝流涕乃止與徐傅及檀道濟共輔政同廢少帝授荊州為外援及文帝誅徐傅晦奉表曰不有所廢將何以興率衆二萬移檄建康為到彥之所執誅之沮渠蒙遜自晉義熙八年僭號河西王其後朱齡石遣使聘之蒙遜遣使報聘因表曰益州刺史朱齡石遣使詣臣始其朝廷休問承將軍劉裕秣馬揮戈以中原為事可謂天贊大晉篤生英輔也陛

下據全楚之地擁荆揚之饒安可垂拱晏然棄二京之功以資戎虜乎若六軍北軫克復有期臣請率河西諸戎為晉右翼前驅自是宋依晉故事並遙加蒙遜官號羈縻之也吳郡太守徐佩之聞羨之既誅乃謀反事泄亦伏誅

經元嘉四年春帝正月乙亥曲赦建業二月乙卯幸丹徒謁京陵夏六月癸卯朔日有蝕之秋七月冬十月傳曰曲赦建業慮都下徐傳親黨或不安也故赦之

辛巳南郊不書略也

元嘉二年已書傳解詳矣

幸丹徒京口也高

祖之考墓在候山其地秦史所謂曲阿丹徒有天子

氣宋國以高祖陵曰初寧陵皇考陵曰京陵謁京陵

因京口地為名禮也六月日蝕皇子劬立之應也

逆子

立天不與也故先見謫于上

經元嘉五年春魏太武皇帝神嘉元年帝正月甲申大

閱

無傳

夏六月詔遣使賑贍秋七月冬十二月魏太武帝

伐夏以赫連昌歸

傳曰自去年五月疾疫至今年正月陰陽愆序故六月戊子都下大水大災異不絕乙卯遣使巡行賑貧民禮也後魏太武皇帝因矢州獻獸河內獻白麋改元神麇夏五月魏伐赫連昌至拔隣山捨輜重以輕騎三萬先行至黑水祈天告祖宗乃誓衆六月大破昌昌奔上邽虜昌及其家人萬數車旗珍寶不可勝計遂班師書以十二月者從赴告也

六月破赫連昌十二月魏始告

捷于宋也春秋列國赴告冊書交相紀南北朝則通使問

亦以克捷相告古史遺法也

經元嘉六年春帝正月辛丑祀南郊三月丁巳劭為太子夏五月日有蝕之秋七月百濟國遣使來貢十一月己丑星晝見十二月西河河南國並遣使來貢

傳曰劭者孰是曰文帝子也立為太子不書皇言劭立不足為皇嗣也百濟者其先東夷三韓國中諸小國之一也後漸強大晉義熙中百濟王餘映朝貢授以鎮東將軍百濟王宋自元嘉以來每歲遣使貢方

物此即餘映也星晝見者日無光也曰日無光君德
不明故星侵日晝見象臣下侵君權也西河者鮮卑
杜嶠之後也河南者其先亦鮮卑慕容奕洛于之後
也二國皆東北通秦隴古流沙之地焉子孫以吐谷
渾為姓自號河南王至是遣使來貢案此國二路隣
益州常通商賈其來非懷中國之舊也實以貿商貨
耳

經元嘉七年春帝正月二月壬戌雪且雷三月遣將軍

到彥之侵魏夏六月封楊難當武都王秋七月冬十月
立錢署戊寅魏克金墉城又克虎牢壬辰遣將軍檀道
濟拒魏師到彥之至滑臺奔退

傳曰雪且雷紀異也到彥之督諸將王仲德竺靈秀
尹冲段宏趙百符庾俊之宋修之等北侵魏自淮入
泗水竭日行十里自四月至七月始至東平以朱修
之守滑臺尹冲守虎牢杜驥守金墉十月魏軍至虎
牢杜驥奔走尹冲衆潰而死魏師進滑臺彥之焚舟

步奔彭城乃免彥之書官後經不書官貶其奔也楊
難當者何仇池公之後也國號武興難當自稱武興
王至是通使于宋宋封之曰武都王始置錢署以鑄
四銖錢濟一時之急非經久之利也園法自太公作
輕重九府子母相權使貧富各得利用後世失其權
泥於執一故錢輕則富者增價錢重則貧者不給於
是有盜鑄犯上之亂作焉晉宋以來四銖錢非古也
經書始置譏失政也檀道濟以到彥之侵魏河南復

為魏所克於是詔遣都督諸軍北略地書曰拒魏師
言苟自固守非制勝之詞也

經元嘉八年春帝正月二月癸酉檀道濟遁歸魏定河
南三月大雩六月乙丑大赦又大雩秋七月冬十月

傳曰檀道濟至齊上與魏師三十餘戰多捷軍至歷

城資運竭夜唱籌量沙以為米魏人謂資糧有餘緩

之乃遁歸不書官譏小智失大謀也

南史云道濟全軍而返雄名大

振北史諱其遁也

書曰魏定河南言江左不能與爭也自是

中原定於魏矣大雩旱也又大雩猶未雨也旱而救懼民有變也然政令一失陰陽失序救之何益乎故書大赦又雩譏非禮也

經元嘉九年魏大武延和元年春帝正月二月詔佐命功臣配享廟庭夏五月太保王弘薨秋七月以殷景仁為僕射冬十月以皇子紹為廬陵王魏滅夏赫連氏及乞伏氏

傳曰二月詔曰故太傅長沙景王

劉道憐

故大司馬烈

武王

劉道規

故司徒文宣公

劉穆之

華容公弘

王弘

永修公

道濟

檀道濟

故龍陽侯

惡鎮

咸有文德以弘帝載有武功

以降景業而太常未銘從祀闕享宜配祭廟庭勒功

天府禮也太保王弘字休元導之曾孫也弘以佐命

功封華容縣公武帝因宴集言曰我布衣始望不至

此是時傅亮等並撰詞以稱功德獨弘對曰此天命

求之不可得推之不可去時人稱其簡當文帝立又

以定策功累遷錄尚書事進太保薨謚曰文昭公配

食武帝廟庭弘不營財物不事威儀將加榮爵於人
必先呵責而後施行若接語欣懽者必無所諧或問
其故答曰王爵既加於人若撫勞之是與人主分功
此姦以事君者也聞者皆悅服書官以薨賢之也書
殷景仁為僕射喜其得人也同時劉湛代景仁為領
軍不書貶湛惡也曷謂景仁善而劉湛惡曰湛與景
仁素相善皆遇於武帝湛常居外任而景仁引湛還
朝共叅朝政而湛陰結彭城王義康以傾景仁故一

書一不書善惡分矣皇子紹為廬陵王者繼孝獻王
義真嗣也乞伏國仁之孫熾盤死以慕末嗣位為夏
赫連所滅赫連氏自勃勃死子昌立為魏所虜昌弟
定復據平涼至是魏舉兵滅之二國先後不同而并
書之者以示魏興中原諸閥位相繼滅矣

赫連乞伏
本二國故

并書
之

經元嘉十年春帝正月甲寅封義宣為南譙王夏林邑
等國朝貢秋七月曲赦梁益秦三州冬十一月揚難當

據梁州沮渠蒙遜死子茂虔立

傳曰義宣帝弟也改封南譙王初封武陵王羣蠻充
斥義宣不能制改封南譙優親正也夏林邑閼婆呵
羅等國遣使朝貢皆以商利來耳紫夷貊傳林邑國
漢象林縣古越裳之域地廣六百里馬援植銅柱之
所也其王法服加纓絡如佛像之飾以吉貝為幡旗
吉貝木
棉也其大姓謂之婆羅門閼婆達國者遣使奉表
其詞曰宋國大王大吉天子足下教化一切種智安

穩天人師降伏四魔轉尊法輪度脫衆生我雖在遠
亦霑靈潤呵羅單國其王毗沙跋摩奉詞曰常勝天
子陛下諸佛世尊三達六通為世間尊是名如來其
時南朝信尚佛法故海蠻得以交易因而巽辭媚王
曲徇夷情非禮也蓋梁秦三州雖遠屬南朝然去就
不定是時楊難當背宋歸魏故曲赦三州以安叛黨
也十一月初難當據梁州亦號東益州其城東連秦
嶺西接宕昌言語與中國同地植九穀婚姻有六禮

知書數出桑麻銅鐵於本國自稱仇池王沮渠蒙遜
臨松胡人先世為沮渠之官遂為氏蒙遜博練羣史
頗曉天文有英略權變乃叛呂光據金山殺段業晉
隆安五年自立為涼州牧至義熙八年僭號至是死
子茂虔嗣偽位焉

經元嘉十一年春帝正月夏四月刺史蕭思話復梁州
五月丁卯以沮渠茂虔為西河王

傳曰蕭思話為梁南二州刺史會氏帥楊難當寇漢

中思話破氐羌收漢中置戍於葭萌帝使思話上定
漢中本末下史官書書曰復梁州從告功也沮渠茂
虔為西河王來通好也

經元嘉十二年春帝正月辛未祀南郊馮弘為燕王夏
四月丙寅都下地震六月大水以穀百萬斛賑民九月
蜀將張尋為寇

傳曰辛未南郊舉舊制也馮弘者何北燕馮跋之弟
也跋信都人其先畢萬子孫有食馮鄉因為氏焉初

事慕容寶後附高雲作亂眾推跋為主晉太元二十
年僭號于昌黎跋寬仁有大度恭慎勤子家勸農桑
省徭役每遣守宰必親見東堂問為政之要令極言
無隱於是朝野競勸又建太學置博士諸偽政皆莫
能比後為魏師所伐地震災異跋問其臣閔尚尚對
曰地主陰陰主百姓震有左右之占今震皆向左臣
懼百姓將西移乎跋乃遣使巡行問民疾苦賜以穀
帛元嘉七年跋卒而弟弘立通好南朝故封為燕王

來遠從權也都下地震零陵王太妃殂之應也

恭帝母也

大水以穀賑民禮也

經元嘉十三年帝正月癸丑朔帝有疾不朝會三月帝
殺司空檀道濟夏四月秋七月晉零陵王太妃殂九月
封皇子濬為始興王駿為武陵王魏伐燕馮弘奔高麗
傳曰帝疾不朝會書變常也南朝元會自晉武帝講
求漢儀叅用魏制著為典常謂之咸寧注是也咸寧
注曰先正一日有司宿設夜漏未盡羣臣集于庭燎

上賀起謁報百官及受勢郎官下至計吏皆入其次
大鴻臚各奏羣臣就位侍中奏外辦皇帝出鍾敔作
百官皆拜伏太常導皇帝升御座鴻臚奏請朝賀掌
禮即讚皇帝延諸王登殿延太尉等登各奉璧皮帛
羔雁雉再拜賀訖引下殿復故位以勢授勢郎郎以
璧皮帛付謁者以羔雁雉付太官太樂令跪奏雅樂
乘黃令出車皇帝罷入百官皆坐諸蠻夷以次入皆
再拜皇帝又出僕射跪奏請羣臣等上奉觴再拜上

千萬歲四廂樂作百官再拜乃行百官酒太樂奏登歌三終乃降太官具御飯尚食持案並授持節持節跪進御座前太樂令奏云奉食舉樂太官行百官飯畢鼓吹令奏進衆技乃召諸郡計吏前授敕戒鐘鼓作羣臣北面再拜出此漢魏叅用儀也宋汾晉制每年正月朔御殿受朝賀以為常典故不比年書之今歲帝疾不視朝故特書不朝會以明常歲皆朝會也檀道濟高平金鄉人隨宋武建義為前鋒所至望風

降以佐命功數帥兵拒魏師三軍依附帝忌憚朝廷
皆目之曰安知非司馬仲達也帝寢疾聽信領軍劉
湛湛及彭城王義康皆慮宮車晏駕道濟不復可制
乃矯詔收付廷尉父子八人皆誅之時人為之語曰
可憐白浮鷗枉殺檀江州明無罪也故書帝殺者言
文帝不能臣焉晉零陵王太妃恭帝太后也以晉儀
葬之禮也濬帝之次子駿第三子即成帝也書始封也馮
弘者跋之弟也為後魏所伐弘東奔高麗高麗殺之

北燕以晉孝武太元二十年僭號至弘三世而滅凡
二十八年地歸于魏

經元嘉十四年春帝正月辛卯祀南郊夏四月蜀賊張
尋降秋七月冬十二月河南西河呵羅單國使朝貢

傳曰蜀賊張尋及其黨趙廣來降遷之建鄴河南慕
延西河沮渠呵羅單西南夷並遣使來貢

經元嘉十五年春帝正月以吐谷渾慕延封隴西王夏
四月秋七月辛未地震新作東宮武都河南高麗倭人

扶南林邑國使朝貢冬十月立儒學于北郊

傳曰吐谷渾慕延其先鮮卑慕容氏也西徙上隴過
抱罕出涼州西南至赤水而居之其界東疊川西于
闐北高昌東北秦嶺方千餘里古流沙地也有青海
出龍馬至慕容延始通江左故封隴西王新作東宮
太子劭居也武都楊難當也河南即吐谷慕容延自
號河南王也高麗王高璉也案高麗王高璉宋武帝
初踐阼加璉為鎮東大
將軍馮弘奔高麗宋遣使王白駒往取之高麗將孫
漱殺弘不欲南來王白駒復殺漱於海璉執白駒送

于宋宋不欲違遠人意下白駒獄由是連每歲來貢焉

倭國王名讚無姓氏物

產興儋耳朱崖同宋初除安東將軍倭國至扶南國
在日南郡海西灣中去日南七千里東通交州西接
天竺安息外交易東西日有萬餘商人珍物無不有
天竺書言與佛經相似林邑與扶南相達崇佛法而
優禮諸蠻故多人貢因商利也帝好文立四學以雷
次宗掌儒學何尚之掌玄學何承天掌史學謝元掌
文學置館于郊法古四郊學也

經元嘉十六年春帝正月戊寅閱武于北郊夏六月立
子鐸為南平王秋九月魏伐北涼擒其王茂度冬十二
月乙亥皇太子劬冠

傳曰閱武北郊懼魏南侵舊典漢魏以來立秋之日
郊禮畢乃揚威武斬牲於東門以薦陵廟其儀帝御
戎服乘白馬朱鬣躬執弓射牲命謁者載以獲車送
陵廟以束帛賜武官隸兵習戰陣之儀斬牲名曰軀
劉軀猛獸名
劉殺也兵習孫吳法六十四陣既還公卿迎拜

天子下車與公卿親識顏面乃還宮自東晉天子不
親令進退而武臣不傳六十四陣至宋惟有閱武之
名而無習兵之法矣案六十四陣此諸葛亮習黃帝
八十一陣遺制也晉馬隆得其術乃以八陣法伐北
涼自後有桓溫者因伐蜀於魚復平沙上觀武侯八
陣基址以石縱橫為八行此則方排成八八六十四
陣之因也其變化即後人莫得傳其奧焉

唐李靖有
兵書對問

三卷得
此法

皇子鐐文帝第三子書始封也魏師伐涼擒

沮渠茂虔平姑臧於是魏盡平涼州舊地焉

偽國盡亡矣

太子劬冠帝往觀之帽無故墜地元兇之兆也

經元嘉十七年魏太武太平真君元年春帝正月夏四月戊午朔日有蝕之秋七月壬子皇后袁氏崩九月壬子葬元皇后冬十月劉湛有罪誅十一月僕射殷景仁卒

傳曰袁皇后袁湛女適文帝為妃生子劬后族貧寒就上求錢帛上性儉不過五十千而已潘淑妃有寵

后因潘求三十萬錢宿昔便得由此恚恨成疾至是
崩命顏延之為哀策文上益八字云撫存悼亡感今
懷昔詔謚曰元皇后劉湛字弘仁父柳晉儀同湛襲
安衆縣男嘗自比管葛不為文章累遷給事中與殷
景仁並任湛曰今世宰相何難正當漢南陽郡功曹
耳後景仁專內任而湛猜隙漸生結彭城王義康以
傾景仁晚黨附義康帝不平之湛亦知必敗會丁艱
伏甲于室以待上臨事泄伏誅不書官貶有罪也殷

景仁陳郡長平人少有大成之量不為文而敏有思致不談義而深達於理舊章記注莫不撰錄文帝委遇尤厚劉湛與義康欲遣人若劫盜者於外殺之上聞之徙景仁西掖門為護軍府密通宮禁故義康計不得行景仁稱疾停家養老數年雖不見任而密函去來朝政大小必問焉及誅劉湛外人莫知預計也卒謚曰文成公

經元嘉十八年春帝正月夏五月甲申江水溢害居人

冬十一月僕射王球卒氏楊難當寇漢川

傳曰江水泛溢害居人陰沔陽下陵上也王球字舊
玉司徒謚之子正方獨立歷位侍中舍人徐爰有寵
於上上命球與之相結球辭曰士庶區別國之章也
臣不敢奉詔王曇首稱球曰舊玉可謂玉卮無當耳
又劉湛殷景仁權傾內外球雖姻戚未嘗往來居選
職接容甚希而銓衡有序尋代殷景仁為僕射江夏
王義恭啓文帝曰王球誠能淡退有素譽然頗以物

外自許端任要功非其所長帝曰昔周伯仁終日飲酒而居此任蓋所以崇素德也楊難當兄之子曰文德奔漢中族弟廣香攻文德因寇漢川焉

經元嘉十九年春帝正月夏四月始奉祠大赦五月將軍裴方明破楊難當秋七月甲戌晦日有蝕之九月丙辰有客星在北斗十二月丙申詔奉聖襲封西涼李寶歸於魏

傳曰帝久疾初愈始親祠大赦南朝以赦罪為求福

非古也裴方明與秦涼二州刺史劉真道同討仇池
破之告功也甲戌晦日食紫星厯九日月合朔則蝕
春秋傳以為月掩日也有朔有晦者大小盡使然耳
案春秋書日食或無朔而有日者或無朔無日者或
有朔無日者餘則日朔皆滿惟食即無明又歷代所
占災異但食即占之不限晦朔也今茲食者天戒若
曰陽為陰所蔽文帝為義康義恭諸侯擅權小人構
隙國衰亂之應也客星在北斗占曰九客星所出有

兵喪北斗帝居也臣下有陰窺神器之象詔奉聖孔氏子孫世世得襲封宋沿晉制行之禮也李寶者西凉武昭王暠孫也書歸于魏不抗兵以庇民也

唐之先也

故別立傳於載記史官

經元嘉二十年春帝正月二月魏克仇池夏四月甲午立皇子誕為廣陵王秋七月冬十月壬午置藉田水旱大饑

傳曰仇池楊難當去年為宋所討難當兄子文德背

魏歸于宋授封武都王至是復為魏所克書曰仇池
不書文德重其地微其人也皇子誕帝第四子也書
始封也初置藉田以水旱相繼欲行藉田以祈農福
妄也案藉田之制夏曰貢商曰藉周曰徹其實皆什
一稅也藉之言借民力耕獲以奉神報先重農功非
徼福也周人藉千畝天子躬耕所以勸農務本漢文
帝始修藉田迄魏氏三祖皆舉三推之禮晉武帝於
東郊之南洛水之北乘輿御木輅以耕江左元帝賀

循定儀注未詳迄今宋國水旱皆修此禮失古義也
經元嘉二十一年春帝正月諸郡禁酒二月辛卯以子
宏為建平王夏四月秋九月以沮渠安周為河西王冬
十月雷且電

傳曰諸郡南充州南豫州浙江西並禁酒行權酤也
是時國窘竭故權酒利以苟安焉建平王宏帝第五
子書始封也沮渠安周者孰謂非沮渠之裔也自茂
虔為魏所滅蓋安周是其疎族僭附於宋虛授以州

刺史河西王非實封也冬雷且電陽愆失所也

九雷之聲

由電也雷

霹靂耳

經元嘉二十二年春帝正月辛卯朔始用新歷二月甲戌立子禕為東海王昶為義陽王夏四月秋九月癸酉宴武帳堂冬十二月范曄反伏誅免義康為庶人

傳曰新歷者何承天所撰元嘉歷也禕帝第六子昶帝第七子皆始封也宴武帳堂帝先勅諸子且勿食至會所賜饌既而日旰諸子有飢色因誡之曰汝曹

少豐溢不知百姓艱難今特使爾識飢當節儉用物也古者享以訓恭儉宴以示慈惠今帝誠諸子因飢使知節儉亦慈惠在其中矣范曄字蔚宗車騎范泰第四子也作宣城太守乃刪衆家後漢書為一家之言徐湛之則無以謝天下上得劾呪詛巫蠱之言上謂義恭曰常見典籍有此將謂空言不意親覩此不幸也先是彗星起畢昴入太微掃帝座端門滅於翼軫又熒惑逆行守昏自十一月霖雨連雪陽光罕耀

劬與始興王濬帝第二子也異謀每夜饗將士或親行酒密與隊主陳叔兒及張超之謀是月二十一日夜詐作上詔云魯秀謀反汝可平明率衆入因使超之率素養士二十人皆被甲入其夜上與徐湛之語至旦燭猶未滅超之行弑上以几自障五指俱落而崩遣人殺吏部江湛即偽位詔曰徐湛之弑逆吾勒兵入殿已無所及今罪人斯得可大赦改元為太初遷大行皇帝於太極殿劬成服號慟義師至劬自督

戰魯秀打退鼓為義師所乘大敗入府庫井中擒之
與濬並伏誅汙其東宮南平王鐸字玄休帝第四子
也元凶既立以鐸為錄尚書事及義師入以歸義最
晚常懷憂懼眠中蹶起無復魂守食中遇毒而薨

經宋孝武帝孝建元年春帝正月即位

經孝建二年

經孝建三年

經大明元年

經大明二年

經大明三年

經大明四年

經大明五年

經大明六年

經大明七年

經大明八年五月

經少帝

子業

永光元年春正月即位

經明帝

湘東王彧

太始元年即位魏取淮南地

經太始二年魏天安元年

經太始三年

經太始四年

經太始五年

經太始六年

經太始七年魏獻文帝傳位于子孝文帝

經太豫元年四月帝崩

經宋廢帝蒼梧王昱元徽元年春正月即位

經元徽二年

經元徽三年

經元徽四年

經元徽五年帝凶惡為楊玉夫弑崩魏獻文帝為后弑

崩

經順帝

準

昇明元年春正月即位

明帝子
九歲

魏太和元年

經昇明二年南齊蕭道成專政

經昇明三年禪位偽齊

元經卷八

欽定四庫全書

元經卷九

隋王通撰

唐薛收傳

宋阮逸注

經後魏孝文帝太和四年春正月

一本書帝即位

文中子曰或問孝文子曰可與興化矣又曰中國之

道不替孝文之力也又曰太和之政近雅矣

都洛陽得中國

也建明堂修制度興文物得先王之道也

一明中國有法也

置職制定律令舉兵百萬

我江陵其後宣武孝明皆修太和之政是中國有法也又曰脩元經以斷南北

之疑晉東遷故南朝推運歷者以齊梁陳為正統魏據中原故北朝推運歷者以北齊周陳為正統

於是南北二支夷虜相乘而天下疑矣元經者所以尊中國也中國無主故正統在東晉及宋中國有主

則正統歸于後魏後周董常問元經之帝魏何也子曰亂離瘼

矣吾誰適歸詩曰月篇也箋云此亂夏病必有所歸天地有奉魏修國丘方澤

之生民有庇十六偽國皆為魏且居先王之國洛邑受

先王之道建明堂修典禮子先王之民矣子亦謂之何哉何謂

而不帝之子曰元經之專斷蓋稟於天命吾安敢至之哉

天命未改於晉祚則斷之於江南
天命歸於中國則繼之於元魏
職制凡詔策帝自述之
帝都洛造明堂置

經太和五年

經太和六年

經太和七年

經太和八年

經太和九年

經太和十年

經太和十一年

經太和十二年

經太和十三年

經太和十四年

經太和十五年

經太和十六年

經太和十七年江南王蕭東奔

經太和十八年

經太和十九年

經太和二十年

改姓元氏

經太和二十一年

經太和二十二年伐江南至樊城而還

經太和二十三年帝崩

經後魏宣武帝恪景明元年春正月即位

經景明二年

經景明三年南齊為梁蕭衍所篡

經正始元年

經正始二年

經正始三年

經正始四年

改元永平

經永平元年

經永平二年

經永平三年

經永平四年

改元延昌

經延昌元年

經延昌二年

經延昌三年

經延昌四年

經後魏孝明帝神熙平元年春正月即位

經熙平二年改元
神龜

經神龜元年

經神龜二年改元
正光

經正光元年梁改普通元年

經正光二年

經正光三年

經正光四年

經正光五年

經孝昌元年

經孝昌二年

經孝昌三年

改武泰

經武泰元年帝崩

立孝文
曾孫釗

爾朱榮弑帝釗別立子攸改

元永安

經孝莊帝永安元年即位

經永安二年

經永安三年帝殺爾朱榮

經前廢帝

恭

普泰元年春正月

不書
即位

經後廢帝

朗

中興元年春正月即位於信都高歡立之

經出帝

修

永熙元年春即位

經永熙二年帝幸長安

經永熙三年帝在長安宇文泰弑帝崩

經西魏文帝大統元年

實炬孝文之孫

即位於長安高歡立

元善見號東魏

經大統二年關中大饑

經大統三年

經大統四年

經大統五年

經大統六年

經大統七年

經大統八年

經大統九年

經大統十年

經大統十一年

經大統十二年梁中大同元年

經大統十三年東魏高歡卒子澄嗣

經大統十四年東魏侯景奔梁

經大統十五年侯景殺梁王蕭衍高澄

經大統十六年高洋殺東魏靖帝自立國號齊

經大統十七年帝崩

經西魏廢帝

欽

元年

從周制立
稱元年

春正月即位

經二年陳霸先誅侯景梁蕭繹立於江陵

經三年帝為宇文泰所廢崩

經西魏恭帝

廓文帝
第二子

元年以宇文泰為太師

經二年蕭簪立于江陵號後梁

經三年宇文泰卒子覺立弒帝崩

經周閔帝覺元年春帝正月即位陳霸先篡梁自立字

文護弒帝崩

經周明帝毓武成元年春帝正月即位

經武成元年陳霸先卒高洋卒

經武成二年宇文護弒帝崩

經周武帝邕保定元年高演卒北齊

經保定二年蕭答卒

經保定三年

經保定四年

經保定五年

改天和

經天和元年陳文帝卒北齊高緯大亂

經天和二年

經天和三年

經天和四年

經天和五年

經天和六年

改元建德

經建德元年遣使聘陳

經建德二年

經建德三年

經建德四年

經建德五年

經建德六年舉師伐鄴高緯亡

改宣政

經宣政元年伐陳獲吳徽帝崩

改元
大象

經周宣帝

贊

大象元年春帝正月即位

改元

經大象二年春帝禪位於太子衍曰靜帝

經周靖帝

衍

大定元年楊堅輔政伐陳盡取淮南

經大定二年禪位於隋

經隋文帝

堅

開皇元年春帝即位封子廣晉王

經開皇二年陳宣帝卒

經開皇三年蘇孝綽置藉田

經開皇四年後梁蕭歸來朝

經開皇五年正月朔日有蝕之立義倉

經開皇六年築長城

經開皇七年後梁蕭琮來朝國亡

經開皇八年出師五十萬伐陳鎮星入東井

經開皇九年春正月白虹夾日晉宋齊梁陳亡

王疑問元經書陳亡而具五國何也子曰江東中國

之舊也衣冠禮樂之所就也永嘉之後江東貴焉

懷帝

永嘉二年中國大亂而元卒不貴者無人也元帝明帝渡江中興衣冠往往依之

賴王導為輔至康穆之世晉祚不衰至孝武齊梁陳賴謝安為之佐後桓玄篡劉裕興賢故衰也

不與其為國也宋嘗有樹晉之功故君子猶興之至齊梁陳無復及中國但自相篡立故

君子不與及其亡也則君子猶懷之自齊梁陳三國其為國

宋故書曰晉宋齊梁陳亡具五以歸其國歸晉舊國且言

其國亡也言自亡矣凝曰晉宋先亡今具之何也子曰衣

冠文物之舊不欲其先亡也故具晉宋齊梁陳以歸

其國也其未亡則君子責其國焉曰中國之禮樂安

在曰君子責齊梁陳之詞也責及其已亡則君子與

其國焉曰猶我中國之遺人也曰者君子猶懷書宋之詞也言齊梁陳亦

晉宋之遺人也此元經所以書也

文中子曰春秋以天道終乎故止獲麟麟不遇時天命窮矣元

經以人事終乎故止陳亡先王之道掃地是人事極矣薛收曰何

謂也曰天人相與之際其可畏也故君子備之

續元經後二十八年終如春秋左傳至孔子卒

元經卷九

欽定四庫全書

元經卷十

唐 薛收 撰

庚戌隋文帝開皇十年春

辛亥經開皇十一年春帝正月焚陳寶器

丁酉以平陳所得古器多為妖

變故 焚 三月突厥獻七寶枕

壬子經開皇十二年

癸丑經開皇十三年春新作仁壽宮

甲寅經開皇十四年春詔州縣吏三年一代

不得重任

乙卯經開皇十五年春帝正月封泰山夏六月焚綾文布

湘州進
詔焚之

丙辰經開皇十六年春

丁巳經開皇十七年夏五月有羣鹿入殿門

戊午經開皇十八年春二月伐高麗

以漢王諒為元帥師水陸三十萬征高麗

秋九月漢王諒薨

兵死者十二三

己未經開皇十九年

庚申經開皇二十年夏四月有天聲如瀉水冬十月廢太子

勇立晉王廣為太子煬帝也

辛酉經仁壽元年夏五月大風拔木

壬戌經仁壽二年陳叔寶薨

癸亥經仁壽三年春河大水文中子奏策於太極殿年二十四

甲子經仁壽四年春秋七月無日光帝崩太子所弒崩

乙丑經隋煬帝大業元年春正月不書即位弒父之賊天下共誅也帝開

沛渠秋八月御龍舟幸江都宮

丙寅 大業二年

丁卯 大業三年煬帝幸東都

戊辰 大業四年

己巳 大業五年幸東都

庚午 大業六年幸江都

辛未 大業七年幸涿鹿秋河南山東大水

壬申 大業八年駕征遼

癸酉 大業九年又征遼楊玄感反

楊素子

甲戌大業十年又征遼秋七月還東都越王侗留守京師

乙亥大業十一年幸并州及鴈門

丙子大業十二年七月幸江都越王侗留守東都

丁丑義寧元年唐公李淵入長安改元義寧立恭帝文中


子辛年三十八恭帝義寧二年字文化及弒帝崩隋三十

寅年唐高祖武德元年

隋開皇元年文帝受禪是年文中子生煬帝大業十

三年改元義寧恭帝立文中子卒明年字文化及殺

恭帝隋三



元經卷十